

Projek serai wangi jana pendapatan penduduk

METRO (SEEMPAT) 5/11/2015 m/s 40

Pelaksanaan Pusat Keusahawanan Universiti Malaysia Pahang (UMP) memilih 11 keluarga di kawasan perumahan bersepadu Bukit Kenau, Pulau Manis, dekat sini, bagi projek penanaman serai wangi yang semakin mendapat permintaan tinggi dalam industri kosmetik negara.

Pelaksanaan projek perintis dalam tempoh tiga bulan bermula akhir bulan lalu itu dilihat sebagai platform dalam usaha menjana pendapatan penduduk yang majoritinya bergantung kepada pekerjaan sendiri selain tidak mempunyai pendapatan tetap sejak mendiami kawasan perumahan berkenaan lima tahun lalu.

Bagi tujuan itu, ahli Kelab Keusahawanan UMP dengan kerjasama Kelab Enactus UMP akan memantau pelaksanaan projek itu dalam tempoh ditetapkan bagi melihat hasilnya sebelum diperluaskan kepada selu-

ruh penduduk perumahan berkenaan.

Surirumah Noraini Abd Wahid, 39, gembira terpilih peserta perintis projek berkenaan.

Katanya, projek itu pasti membantu meringankan beban kewangan terpaksa ditanggung suami, Mohd Idris Ibrahim, 44, yang bekerja sebagai penoreh getah dengan pendapatan kira-kira RM800 sebulan.

Dia ditemui selepas majlis pelancaran projek penanaman serai wangi dan kraf tangan jerami oleh Ahli Dewan Undangan Negeri (ADUN) Pulau Manis, Datuk Khairuddin Mahmud di perumahan berkenaan, kelmarin.

Hadir sama Penolong Naib Canselor Jabatan Jaringan Industri dan Masyarakat (JJIM) UMP, Prof Dr Zulkefli Yaakob dan Pengarah Pusat Keusahawanan UMP, Prof Dr Noor Azlinna Azizan.



KHAIRUDDIN (kanan) menanam pokok serai wangi sebagai simbolik projek penanaman serai wangi yang dikendalikan Pusat Keusahawanan UMP dan Kelab Enactus UMP di kawasan perumahan bersepadu Bukit Kenau.